

爐香乍爇 法界蒙熏 諸佛海會悉遙聞
隨處結祥雲 誠意方殷 諸佛現全身
南無香雲蓋菩薩摩訶薩 (三唱)

南無本師釋迦牟尼佛 (三稱)

無上甚深微妙法 百千萬劫難遭遇
我今見聞得受持 願解如來真實義

大般涅槃經卷第一

序品第一

如是我聞：一時，佛在拘尸那城，力士生地阿夷羅跋提河邊，娑羅雙樹間。爾時，世尊與大比丘八十億百千人俱，前後圍繞，二月十五日臨涅槃時，以佛神力出大音聲，其聲徧滿乃至有頂，隨其類音普告眾生：「今日如來、應供、正徧知，憐愍眾生覆護眾生，等視眾生如羅睺羅，為作歸依，為世間舍，大覺世尊將欲涅槃，一切眾生若有所疑，今悉可問，為最後問。」

爾時世尊於晨朝時，從其面門放種種光，其明雜色，青、黃、赤、白、玻瓈、碼碯，光徧照此三千大千佛之世界，乃至十方亦復如是，其中所有六趣眾生遇斯光者，罪垢煩惱一切消除，是諸眾生見聞是已心大憂惱，同時舉聲悲號啼哭：「嗚呼慈父，痛哉苦哉。」舉手拍頭槌胸大叫，其中或有身體

戰慄、涕泣、哽咽。

爾時，大地諸山、大海皆悉震動，時諸眾生共相謂言：「且各裁抑，莫大愁苦，當共疾往詣拘尸城力士生處，至如來所，頭面禮敬，勸請如來莫般涅槃，住世一劫若減一劫。」互相執手復作是言：「世間虛空，眾生福盡，不善諸業增長出世。仁等今當速往速往，如來不久必入涅槃。」又作是言：「世間虛空！世間虛空！我等從今無有救護，無所宗仰，貧窮孤露。一旦遠離無上世尊，設有疑惑當復問誰？」

時有無量諸大弟子，尊者摩訶迦旃延、尊者薄拘羅、尊者憂波難陀，如是等諸大比丘，遇佛光者其身戰掉，乃至大動不能自持，心濁迷悶發聲大叫，生如是等種種苦惱。

爾時，復有八十百千諸比丘等皆阿羅漢，心得自在，所作已辦，離諸煩惱，調伏諸根，如大龍王有大威德，成就空慧，逮得己利，如梅檀林，梅檀圍繞，如師子王，師子圍繞，成就如是無量功德，一切皆是佛之真子，各於晨朝日初出時，離常住處方用楊枝，遇佛光明更相謂言：「仁等，宜速澡漱清淨。」作是言已，舉身毛豎，徧體血現如波羅奢華，涕泣盈目生大苦惱，為欲利益安樂眾生，成就大乘第一空行，顯發如來方便密教，為不斷絕種種說法，為諸眾生調伏因緣故，疾至佛所，稽首佛足繞百千匝，合掌恭敬卻坐一面。

爾時，復有拘陀羅女善賢比丘尼、優波難陀比丘尼、海意比丘尼，與六十億比丘尼等，一切亦是大阿羅漢，諸漏已盡，心得自在，所作已辦，離諸煩惱，調伏諸根，猶如大龍有大威德，成就空慧。亦於晨朝日初出時，舉身毛豎徧體血現如波羅奢華，涕泣盈目生大苦惱，亦欲利益安樂眾生，成就大乘第一空行，顯發如來方便密教，為不斷絕種種說法，為諸眾生調伏因緣故，疾至佛所，稽首佛足繞百千匝，合掌恭敬卻坐一面。

比丘尼眾中復有諸比丘尼，皆是菩薩，人中之龍，位階十地，安住不動，為化眾生現受女身，而常修集四無量心，得自在力能化作佛。

爾時，復有一恆河沙菩薩摩訶薩，人中之龍，位階十地，安住不動，方便現身，其名曰：海德菩薩、無盡意菩薩，如是等菩薩摩訶薩而為上首，其心皆悉敬重大乘、安住大乘、深解大乘、愛樂大乘、守護大乘，善能隨順一切世間，作是誓言：「諸未度者，當令得度。」已於過去無數劫中修持淨戒，善持所行，解未解者，紹三寶種使不斷絕，於未來世當轉法輪，以大莊嚴而自莊嚴，成就如是無量功德，等觀眾生如視一子，亦於晨朝日初出時，遇佛光明舉身毛豎，徧體血現如波羅奢華，涕泣盈目生大苦惱，亦為利益安樂眾生，成就

大乘第一空行，顯發如來方便密教，為不斷絕種種說法，為諸眾生調伏因緣故疾至佛所，稽首佛足繞百千匝，合掌恭敬卻坐一面。

爾時，復有二恆河沙諸優婆塞，受持五戒威儀具足，其名曰：威德無垢稱王優婆塞、善德優婆塞等而為上首，深樂觀察諸對治門，所謂：苦樂、常無常、淨不淨、我無我、實不實、歸依非歸依、眾生非眾生、恆非恆、安非安、為無為、斷不斷、涅槃非涅槃、增上非增上，常樂觀察如是等法對治之門，亦欲樂聞無上大乘，如所聞已能為他說，善持淨戒，渴仰大乘，既自充足，復能充足餘渴仰者，善能攝取無上智慧，愛樂大乘，守護大乘，善能隨順一切世間，度未度者，解未解者，紹三寶種使不斷絕，於未來世當轉法輪，以大莊嚴而自莊嚴，心常深味清淨戒行，悉能成就如是功德，於諸眾生大悲心，平等無二如視一子，亦於晨朝日初出時，為欲闍毗如來身故，人人各取香木萬束、栴檀沈水、牛頭栴檀、天木香等，是一一木，文理及附皆有七寶微妙光明，譬如種種雜彩畫飾，以佛力故，有是妙色青黃赤白，為諸眾生之所樂見，諸木皆以種種香塗，鬱金沈水及膠香等，散以諸華而為莊嚴，優鉢羅華、拘物頭華、波頭摩華、芬陀利華，諸香木上懸五色旛，柔軟微妙猶如天衣、憍奢耶衣、芻摩繒綵，是諸香木載以寶車，是諸寶車出種種光青黃赤白，轆輻皆以七寶廁填，是一一車駕以駟馬，是一一馬駿疾如風，一一車

前豎立五十七寶妙幢，真金羅網彌覆其上，一一寶車復有五十微妙寶蓋，一一車上垂諸華鬘，優鉢羅華、拘物頭華、波頭摩華、芬陀利華，其華純以真金為葉金剛為臺，是華臺中多有黑蠶，遊集其中歡娛受樂，又出妙音，所謂：無常、苦、空、無我，是音聲中，復說菩薩本所行道。復有種種歌舞伎樂、箏笛、箜篌、簫瑟、鼓吹，是樂音中復出是言：「苦哉！苦哉！世間空虛！」一一車前，有優婆塞擊四寶案，是諸案上有種種華，優鉢羅華、拘物頭華、波頭摩華、芬陀利華、鬱金諸香及餘熏香微妙第一。

諸優婆塞為佛及僧辦諸食具，種種備足，皆是梅檀沈水香薪，八功德水之所成熟，其食甘美有六種味：一苦、二醋、三甘、四辛、五鹹、六淡。復有三德：一者輕軟、二者淨潔、三者如法，作如是等種種莊嚴。至力士生處娑羅雙樹間，復以金沙徧布其地，以迦陵伽衣、欽婆羅衣及繒綵衣而覆沙上，周匝徧滿十二由旬，為佛及僧敷置七寶師子之座，其座高大如須彌山，是諸座上皆有寶帳垂諸瓔珞，諸娑羅樹，悉懸種種微妙旛蓋，種種好香用以塗樹，種種名華以散樹間。諸優婆塞各作是念：「一切眾生若有所乏，飲食、衣服、頭目支體，隨其所須皆悉給與。」作是施時，離欲瞋恚穢濁毒心，無餘思願求世福樂，唯志無上清淨菩提。

是優婆塞等皆已安住於菩薩道，復作是念：「如來今者受我

食已，當入涅槃。」作是念已身毛皆豎，徧體血現如波羅奢華，涕泣盈目生大苦惱，各各齎持供養之具，載以寶車、香木、幢幡、寶蓋、飲食，疾至佛所稽首佛足，以其所持供養之具欲供養如來，繞百千匝，舉聲號泣哀動天地，槌胸大叫淚下如雨，復相謂言：「苦哉，仁者！世間空虛！世間空虛！」便自舉身，投如來前而白佛言：「唯願如來，哀受我等最後供養！」世尊知時默然不受，如是三請悉皆不許。諸優婆塞不果所願，心懷悲惱默然而住，猶如慈父唯有一子卒病命終，殯送還歸極大憂惱，諸優婆塞悲泣懊惱亦復如是，以諸供具安置一處，卻在一面默然而坐。

爾時，復有三恆河沙諸優婆夷，受持五戒威儀具足，其名曰：壽德優婆夷、德鬘優婆夷、毗舍佉優婆夷等八萬四千而為上首，悉能堪任護持正法，為度無量百千眾生故現女身呵責家法，自觀己身如四毒蛇，是身常為無量諸蟲之所啖食，是身臭穢、貪欲獄縛，是身可惡猶如死狗，是身不淨九孔常流，是身如城，血肉筋骨皮裹其上，手足以為卻敵樓櫓，目為寮孔，頭為殿堂，心王處中，如是身城諸佛世尊之所棄捨，凡夫愚人常所味著，貪淫、瞋恚、愚癡、羅剎止住其中，是身不堅，猶如蘆葦、伊蘭、水沫、芭蕉之樹，是身無常念念不住，猶如電光、瀑水、幻燄，亦如畫水，隨畫隨合，是身易壞，猶如河岸臨竣大樹。是身不久當為狐狼、鴟梟、鷂鷲、烏鵲、餓狗之所食啖，誰有智者當樂此身？寧以牛跡盛大

海水，不能具說是身無常、不淨、臭穢，寧丸大地使如棗等，漸漸轉小猶葶藶子乃至微塵，不能具說是身過患。是故當捨如棄涕唾，以是因緣，諸優婆夷以空、無相、無願之法，常修其心，深樂咨受大乘經典，聞已亦能為他演說，護持本願，毀訾女身甚可患厭，性不堅牢，心常修集如是正觀，破壞生死無際輪轉。渴仰大乘，既自充足復能充足餘渴仰者，深樂大乘，守護大乘，雖現女身實是菩薩，善能隨順一切世間，度未度者，解未解者，紹三寶種使不斷絕，於未來世當轉法輪，以大莊嚴而自莊嚴，堅持禁戒，皆悉成就如是功德，於諸眾生大慈悲心，平等無二如視一子，亦於晨朝日初出時，各相謂言：「今日宜應至雙樹間。」諸優婆夷所設供具，倍勝於前，持至佛所，稽首佛足繞百千匝，而白佛言：「世尊！我等今者，為佛及僧辦諸供具，唯願如來，哀受我供！」如來默然而不許可，諸優婆夷不果所願，心懷惆悵卻坐一面。

爾時，復有四恆河沙毗舍離城諸離車等，男女大小、妻子眷屬，及閻浮提諸王眷屬，為求法故，善修戒行威儀具足，摧伏異學壞正法者，常相謂言：「我等當以金銀倉庫，為令甘露、無盡正法、深奧之藏久住於世。願令我等常得修學，若有誹謗佛正法者，當斷其舌。」復作是願：「若有出家毀禁戒者，我當罷令還俗策使。有能深樂護持正法，我當敬重如事父母。若有眾僧能修正法，我當隨喜令得勢力。」常欲樂

聞大乘經典，聞已亦能為人廣說，皆悉成就如是功德。其名曰：淨無垢藏離車子、淨不放逸離車子、恆水無垢淨德離車子，如是等各相謂言：「仁等，今可速往佛所。」所辦供養種種具足，一一離車，各嚴八萬四千大象、八萬四千駟馬寶車、八萬四千明月寶珠，天木栴檀沈水薪束，種種各有八萬四千。一一象前，有寶幢旛蓋，其蓋小者，周匝縱廣滿一由旬，旛最短者長三十二由旬，寶幢下者高百由旬。持如是等供養之具往至佛所，稽首佛足，繞百千匝而白佛言：「世尊！我等今者為佛及僧辦諸供具，唯願如來哀受我供！」如來默然而不許可，諸離車等，不果所願心懷愁惱。以佛神力，去地七多羅樹，於虛空中默然而住。

爾時，復有五恆河沙大臣長者，敬重大乘，若有異學謗正法者，是諸人等力能摧伏，猶如雹雨摧折草木。其名曰：日光長者、護世長者、護法長者如是之等而為上首，所設供具五倍於前，俱共持往詣雙樹間，稽首佛足繞百千匝而白佛言：「世尊！我等今者為佛及僧設諸供具，唯願哀愍受我等供！」如來默然而不受之，諸長者等不果所願，心懷愁惱，以佛神力，去地七多羅樹，於虛空中默然而住。

爾時，復有毗舍離王及其夫人、後宮眷屬，閻浮提內所有諸王除阿闍世，并及城邑聚落人民，其名曰：月無垢王等，各嚴四兵，欲往佛所，是一一王，各有一百八十萬億人民眷屬

，是諸車兵駕以象馬，象有六牙，馬疾如風，莊嚴供具六倍於前，諸寶蓋中有極小者，周匝縱廣滿八由旬，旛極短者十六由旬，寶幢下者三十六由旬，是諸王等安住正法，惡賤邪法，敬重大乘，深樂大乘，憐愍眾生等如一子，所持飲食香氣流布滿四由旬，亦於晨朝日初出時，持是種種上妙甘膳，詣雙樹間，至如來所而白佛言：「世尊！我等為佛及比丘僧設是供具，唯願如來，哀愍受我最後供養！」如來知時亦不許可。是諸王等不果所願，心懷愁惱卻住一面。

爾時，復有七恆河沙諸王夫人，唯除阿闍世王夫人，為度眾生現受女身，常觀身行，以空、無相、無願之法熏修其心。其名曰：三界妙夫人、愛德夫人。如是等諸王夫人，皆悉安住於正法中，修行禁戒威儀具足，憐愍眾生等如一子，各相謂言：「今宜速往，詣世尊所。」諸王夫人，所設供養七倍於前，香華、寶幢、繒綵、旛蓋、上妙飲食，寶蓋小者周匝縱廣十六由旬，旛最短者三十六由旬，寶幢卑者六十八由旬，飲食香氣周徧流布滿八由旬，持如是等供養之具往如來所，稽首佛足繞百千匝而白佛言：「世尊！我等為佛及比丘僧設是供具，唯願如來哀愍受我最後供養！」如來知時默然不受。時諸夫人不果所願，心懷愁惱，自拔頭髮槌胸大哭，猶如慈母新喪愛子，卻住一面默然而坐。

爾時，復有八恆河沙諸天女等，其名曰：廣日天女而為上首

，作如是言：「汝等諸姊！諦觀，諦觀！是諸人眾所設種種上妙供具，欲供如來及比丘僧。我等亦當如是嚴設微妙供具，供養如來，如來受已當入涅槃。諸姊！諸佛如來出世甚難，最後供養亦復倍難，若佛涅槃世間空虛。」是諸天女愛樂大乘，欲聞大乘，聞已亦能為人廣說。渴仰大乘，既自充足，復能充足餘渴仰者，守護大乘，若有異學憎嫉大乘，勢能摧滅如雹摧草，護持戒行威儀具足，善能隨順一切世間，度未度者，脫未脫者，於未來世當轉法輪，紹三寶種使不斷絕，修學大乘，以大莊嚴而自莊嚴，成就如是無量功德，等慈眾生如視一子。亦於晨朝日初出時，各取種種天木香等，倍於人間所有香木，其木香氣，能滅人中種種臭穢。白車白蓋駕四白馬，一一車上皆張白帳，其帳四邊懸諸金鈴、種種香華、寶幢、旛蓋、上妙甘膳、種種伎樂，敷師子座，其座四足純紺瑠璃，於其座後，各各皆有七寶倚牀，一座前復有金机，復以七寶而為燈樹，種種寶珠以為燈明，微妙天華徧布其地。是諸天女設是供已，心懷哀感涕淚交流生大苦惱，亦為利益安樂眾生，成就大乘第一空行，顯發如來方便密教，亦為不斷種種說法，往詣佛所稽首佛足，繞百千匝而白佛言：「世尊！唯願如來，哀受我等最後供養！」如來知時默然不受，諸天女等不果所願，心懷憂惱，卻住一面默然而坐。

爾時，復有九恆河沙諸龍王等住於四方，其名曰：和修吉龍

王、難陀龍王、婆難陀龍王而為上首，是諸龍王亦於晨朝日初出時，設諸供具倍於人天，持至佛所稽首佛足，繞百千匝而白佛言：「唯願如來，哀受我等最後供養！」如來知時默然不受，是諸龍王不果所願，心懷愁惱卻坐一面。

爾時，復有十恆河沙諸鬼神王，毗沙門王而為上首，各相謂言：「仁等，今者可速詣佛所。」所設供具倍於諸龍，持往佛所稽首佛足，繞百千匝而白佛言：「唯願如來，哀受我等最後供養！」如來知時默然不許，是諸鬼王不果所願，心懷愁惱卻坐一面。

爾時，復有二十恆河沙金翅鳥王，降怨鳥王而為上首；復有三十恆河沙乾闥婆王，那羅達王而為上首；復有四十恆河沙緊那羅王，善見王而為上首；復有五十恆河沙摩睺羅伽王，大善見王而為上首；復有六十恆河沙阿修羅王，睽婆利王而為上首；復有七十恆河沙陀那婆王，無垢河水王、跋提達多王等而為上首；復有八十恆河沙羅剎王，可畏王而為上首，捨離惡心更不食人，於怨憎中生慈悲心，其形醜陋，以佛神力皆悉端正；復有九十恆河沙樹林神王，樂香王而為上首；復有千恆河沙持呪王，大幻持呪王而為上首；復有一億恆河沙貪色鬼魅，善見王而為上首；復有百億恆河沙天諸婬女，天籃婆女、鬱婆尸女、帝路沾女、毗舍佉女而為上首；復有千億恆河沙地諸鬼王，白溼王而為上首；復有十萬億恆河沙

等諸天子，及諸天王四天王等。復有十萬億恆河沙等四方風神，吹諸樹上，時非時華散雙樹間。復有十萬億恆河沙主雲雨神皆作是念：「如來涅槃焚身之時，我當注雨令火時滅，眾中熱悶為作清涼。」

復有二十恆河沙大香象王，羅睺象王、金色象王、甘味象王、紺眼象王、欲香象王等而為上首，敬重大乘，愛樂大乘，知佛不久當般涅槃，各各拔取無量無邊諸妙蓮華來至佛所，頭面禮佛卻住一面。復有二十恆河沙等師子獸王，師子吼王而為上首，施與一切眾生無畏，持諸華果來至佛所，稽首佛足卻住一面。復有二十恆河沙等諸飛鳥王，鳧雁、鴛鴦、孔雀諸鳥、乾闥婆鳥、迦蘭陀鳥、鳩鵲鸚鵡、俱翅羅鳥、婆僂伽鳥、迦陵頻伽鳥、耆婆耆婆鳥，如是等諸鳥，持諸華果來至佛所，稽首佛足卻住一面。復有二十恆河沙等水牛、牛、羊往至佛所，出妙香乳，其乳流滿拘尸那城所有溝坑，色香美味悉皆具足，成是事已卻住一面。復有二十恆河沙等四天下中諸神仙人，忍辱仙等而為上首，持諸香華及諸甘果來詣佛所，稽首佛足繞佛三匝而白佛言：「唯願世尊，哀受我等最後供養！」如來知時默然不許，時諸仙人不果所願，心懷愁惱卻住一面。

閻浮提中一切蜂王，妙音蜂王而為上首，持種種華來詣佛所，稽首佛足繞佛一匝卻住一面。爾時，閻浮提中比丘、比丘

尼一切皆集，唯除尊者摩訶迦葉、阿難二眾，復有無量阿僧祇恆河沙等世界中間，及閻浮提所有諸山，須彌山王而為上首，其山莊嚴叢林蓊鬱，枝葉茂盛蔭蔽日光，種種妙華周徧嚴飾，龍泉流水清淨香潔，諸天龍神、乾闥婆、阿修羅、迦樓羅、緊那羅、摩睺羅伽、神仙呪術作倡伎樂，如是等眾彌滿其中，是諸山神亦來詣佛，稽首佛足卻住一面。

復有阿僧祇，恆河沙等四大海神及諸河神，有大威德具大神足，所設供養倍勝於前，諸神身光伎樂燈明，悉蔽日月令不復現，以占婆華散熙連河，來至佛所，稽首佛足卻住一面。

爾時，拘尸那城娑羅樹林，其林變白猶如白鶴，於虛空中，自然而有七寶堂閣，彫文刻鏤綺飾分明，周匝欄楯眾寶雜廁，堂下多有流泉浴池，上妙蓮華彌滿其中，猶如北方鬱單越國，亦如忉利歡喜之園。爾時娑羅樹林中間，種種莊嚴甚可愛樂亦復如是，是諸天、人、阿修羅等咸覩如來涅槃之相，皆悉悲感愁憂不樂。

爾時，四天王、釋提桓因各相謂言：「汝等觀察諸天、世人及阿修羅大設供養，欲於最後供養如來，我等亦當如是供養，若我最後得供養者，檀波羅蜜則為成就滿足不難。」爾時四天王，所設供養倍勝於前，持曼陀羅華、摩訶曼陀羅華、迦枳樓伽華、摩訶迦枳樓伽華、曼殊沙華、摩訶曼殊沙華、

散多尼迦華、摩訶散多尼迦華、愛樂華、大愛樂華、普賢華、大普賢華、時華、大時華、香城華、大香城華、歡喜華、大歡喜華、發欲華、大發欲華、香醉華、大香醉華、普香華、大普香華、天金葉華、龍華、波利質多樹華、拘毗羅樹華，復持種種上妙甘膳，來至佛所稽首佛足，是諸天人所有光明，能覆日月令不復現。以是供具欲供養佛，如來知時默然不受，爾時諸天不果所願，愁憂苦惱卻住一面。

爾時，釋提桓因及三十三天，設諸供具亦倍勝前，及所持華亦復如是，香氣微妙甚可愛樂，持得勝堂并諸小堂來至佛所，稽首佛足而白佛言：「世尊！我等深樂愛護大乘，唯願如來哀受我食！」如來知時默然不受，時諸釋天不果所願，心懷愁惱卻住一面。

乃至第六天所設供養展轉勝前，寶幢旛蓋，寶蓋小者覆四天下，旛最短者周圍四海，幢最卑者至自在天，微風吹旛出妙音聲，持上甘膳來詣佛所，稽首佛足白佛言：「世尊！唯願如來，哀受我等最後供養！」如來知時默然不受，是諸天等不果所願，心懷愁惱卻住一面。

上至有頂其餘梵眾，一切來集。爾時大梵天王及餘梵眾放身光明，徧四天下。欲界人天，日月光明悉不復現，持諸寶幢、繒綵、旛蓋，旛極短者懸於梵宮，至娑羅樹間來詣佛所，

稽首佛足白佛言：「世尊！唯願如來，哀受我等最後供養！」如來知時默然不受，爾時諸梵不果所願，心懷愁惱卻住一面。

爾時，毗摩質多阿修羅王，與無量阿修羅大眷屬俱，身諸光明勝於梵天，持諸寶幢繒綵旛蓋，其蓋小者覆千世界，上妙甘膳來詣佛所，稽首佛足而白佛言：「唯願如來，哀受我等最後供養！」如來知時默然不受，諸阿修羅不果所願，心懷愁惱卻住一面。

爾時，欲界魔王波旬與其眷屬，諸天婁女無量無邊阿僧祇眾，開地獄門施清淨水因而告曰：「汝等今者無所能為，唯當專念如來、應供、正徧知，建立最後隨喜供養，當令汝等長夜獲安。」時，魔波旬於地獄中，悉除刀劍無量苦毒，熾然燄火注雨滅之，以佛神力復發是心，令諸眷屬皆捨刀劍、弓弩、鎧杖、鋒稍、長鉤、金椎、鉞斧、鬥輪、胃索，所持供養，倍勝一切人天所設，其蓋小者覆中千界，來至佛所稽首佛足而白佛言：「我等今者愛樂大乘，守護大乘，世尊！若有善男子、善女人為供養故、為怖畏故、為誑他故、為財利故、為隨他故，受是大乘，或真或偽，我等爾時當為是人，除滅怖畏說如是呪：『佉枳 咤咤羅佉枳 盧呵隸 摩訶盧訶隸 阿羅 遮羅多羅 莎呵』，是呪能令諸失心者、怖畏者、說法者、不斷正法者，為伏外道故、護己身故、護正法

故、護大乘故說如是呪，若有能持如是呪者無惡象怖，若至曠野、空澤、險處不生怖畏，亦無水火、師子、虎狼、盜賊王難，世尊！若有能持如是呪者，悉能除滅如是等怖。世尊！持是呪者，我當護之如龜藏六。世尊！我等今者不以諛諂說如是事，持是呪者我當至誠益其勢力，唯願如來，哀受我等最後供養！」

爾時佛告魔波旬言：「我不受汝飲食供養，我已受汝所說神呪，為欲安樂一切眾生四部眾故。」佛說是已默然不受，如是三請皆亦不受。時魔波旬不果所願，心懷愁惱卻住一面。

爾時，大自在天王與其眷屬無量無邊，及諸天眾所設供具悉覆梵釋、護世四天王、人天八部及非人等所有供具，梵釋所設，猶如聚墨，在珂貝邊悉不復現，寶蓋小者能覆三千大千世界，持如是等供養之具來詣佛所，稽首佛足，繞無數匝而白佛言：「世尊！我等所奉微末供具，猶如蚊蚋供養於我，亦如有人以一掬水投於大海、然一小燈助百千日、春夏之月眾華茂盛有持一華益於眾華、以葶蘆子益須彌山，豈當有益大海、日明、眾華、須彌？世尊！我今所奉微末供具亦復如是，若以三千大千世界滿中香華、伎樂、旛蓋，供養如來尚不足言，何以故？如來為諸眾生，常於地獄、餓鬼、畜生諸惡趣中受諸苦惱，是故世尊，應見哀愍受我等供！」

爾時，東方去此無量無數阿僧祇恆河沙微塵等世界，彼有佛土，名：意樂美音，佛號：虛空等，如來、應供、正徧知、明行足、善逝、世間解、無上士、調御丈夫、天人師、佛、世尊，爾時，彼佛即告第一大弟子言：「善男子！汝今宜往西方娑婆世界，彼土有佛，號：釋迦牟尼，如來、應供、正徧知、明行足、善逝、世間解、無上士、調御丈夫、天人師、佛、世尊，彼佛不久當般涅槃。善男子！汝可持此世界香飯：其飯香美，食之安隱。可以奉獻彼佛世尊，世尊食已，入般涅槃。善男子！并可禮敬，請決所疑。」

爾時，無邊身菩薩摩訶薩，即受佛教從座而起，稽首佛足右繞三匝，與無量阿僧祇大菩薩眾俱，從彼國發來至此娑婆世界，應時此間三千大千世界大地六種震動，於是眾中，梵、釋、四王、魔王波旬、摩醯首羅，如是大眾見是地動，舉身毛豎喉舌枯燥，驚怖戰慄各欲四散，自見其身無復光明，所有威德悉滅無餘。

是時，文殊師利法王子即從座起告諸大眾：「諸善男子！汝等勿怖！汝等勿怖！何以故？東方去此無量無數阿僧祇恆河沙微塵等世界，有一世界，名：意樂美音，佛號：虛空等，如來、應供、正徧知，十號具足，彼有菩薩，名：無邊身，與無量菩薩欲來至此，供養如來，以彼菩薩威德力故，令汝身光悉不復現，是故汝等應生歡喜，勿懷恐怖。」爾時大眾

，悉皆遙見彼佛大眾，如明鏡中自觀己身。

時文殊師利復告大眾：「汝今所見彼佛大眾如見此佛，以佛神力，復當如是得見九方無量諸佛。」

爾時，大眾各相謂言：「苦哉！苦哉！世間虛空！如來不久當般涅槃！」是時大眾，一切悉見無邊身菩薩及其眷屬，是菩薩身一一毛孔，各各出生一大蓮華，一一蓮華各有七萬八千城邑，縱廣正等如毗舍離城，牆壁諸塹七寶雜廁，多羅寶樹七重行列，人民熾盛安隱豐樂，閻浮檀金以為卻敵，一一卻敵，各有種種七寶，林樹華果茂盛，微風吹動出微妙音，其聲和雅猶如天樂，城中人民聞是音聲，即時得受上妙快樂。是諸塹中，妙水盈滿，清淨香潔如真瑠璃，是諸水中有七寶船，諸人乘之遊戲澡浴，共相娛樂快樂無極。復有無量雜色蓮華，優鉢羅華、拘物頭花、波頭摩華、芬陀利華，其華縱廣猶如車輪。其塹岸上多有園林，一一園中有五泉池，是諸池中復有諸華，優鉢羅華、拘物頭華、波頭摩華、芬陀利華，其華縱廣亦如車輪，香氣芬馥甚可愛樂，其水清淨柔軟第一，鳧雁、鴛鴦遊戲其中，其園各有眾寶宮宅，一一宮宅縱廣正等滿四由旬，所有牆壁四寶所成，所謂：金、銀、瑠璃、玻瓈，真金窗牖周匝欄楯，玫瑰為地金沙布上，是宮宅中多有七寶流泉浴池，一一池邊，各有十八黃金梯陛，閻浮檀金為芭蕉樹，如忉利天歡喜之園。是一一城，各有八萬四

千人王，一一諸王，各有無量夫人、嫫女，共相娛樂，歡喜受樂，其餘人民亦復如是，各於住處共相娛樂，是中眾生不聞餘名，純聞無上大乘之聲。是諸華中，一一各有師子之座，其座四足皆紺瑠璃，柔軟素衣以布座上，其衣微妙出過三界。一一座上有一王坐，以大乘法教化眾生，或有眾生書持、讀誦、如說修行，如是流布大乘經典。爾時無邊身菩薩，安止如是無量眾生，於自身已令捨世樂，皆作是言：「苦哉！苦哉！世間虛空！如來不久當般涅槃！」

爾時，無邊身菩薩與無量菩薩周匝圍繞，示現如是神通力已，持是種種無量供具，及以上妙香美飲食，若有得聞是食香氣，煩惱諸垢皆悉消滅，以是菩薩神通力故，一切大眾悉皆得見如是變化，無邊身菩薩身大無邊，量同虛空，唯除諸佛，餘無能見是菩薩身其量邊際。爾時，無邊身菩薩及其眷屬，所設供養倍勝於前，來至佛所稽首佛足，合掌恭敬白佛言：「世尊！唯願哀愍受我等食！」如來知時默然不受，如是三請悉亦不受。爾時無邊身菩薩及其眷屬卻住一面。南西北方諸佛世界，亦有無量無邊身菩薩，所持供養倍勝於前，來至佛所，乃至卻住一面皆亦如是。

爾時，娑羅雙樹吉祥福地，縱廣三十二由旬，大眾充滿，間無空缺。爾時，四方無邊身菩薩及其眷屬所坐之處，或如錐頭、針鋒、微塵，十方如微塵等諸佛世界諸大菩薩，悉來集

會，及閻浮提一切大眾亦悉來集，唯除尊者摩訶迦葉、阿難二眾、阿闍世王及其眷屬，乃至毒蛇，視能殺人，蝘蝓、蝮蝎，及十六種行惡業者，一切來集。陀那婆神、阿修羅等，悉捨惡念皆生慈心，如父如母、如姊如妹；三千大千世界眾生，慈心相向亦復如是，除一闍提。

爾時三千大千世界，以佛神力故，地皆柔軟，無有丘墟、土沙、礫石、荊棘、毒草，眾寶莊嚴，猶如西方無量壽佛極樂世界，是時大眾悉見十方，如微塵等諸佛世界，如於明鏡自觀己身，見諸佛土亦復如是。

爾時，如來面門所出五色光明，其光明曜覆諸大會，令彼身光悉不復現，所應作已，還從口入。時諸天人及諸會眾阿修羅等，見佛光明還從口入，皆大恐怖身毛為豎，復作是言：「如來光明出已還入，非無因緣，必於十方所作已辦，將是最後涅槃之相。何期苦哉！何期苦哉！如何世尊，一旦捨離四無量心，不受人天所奉供養？聖慧日光從今永滅，無上法船於斯沉沒，嗚呼痛哉，世間大苦！」舉手搥胸悲號啼哭，支節戰動不能自持，身諸毛孔流血灑地。

大般涅槃經卷第一

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉但那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶 (三遍)

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國